



**Sud Bosne i Hercegovine**  
**Суд Босне и Херцеговине**

---

Broj: S1 3 Iž 028793 18 Iž  
Sarajevo, 11.06.2018. godine

I Z V O R N I K

Sud Bosne i Hercegovine u Sarajevu, u Apelacionom upravnom vijeću, sastavljenom od sudija Zvezdane Antonović, kao predsjednika vijeća, Dinke Bešlagić-Čovrk i dr. Branko Morait, kao članova vijeća, odlučujući po žalbi žalitelja SRPSKA RADIKALNA STRANKA DR VOJISLAV ŠEŠELJ iz Bijeljine, ulica Karađorđeva broj 41, izjavljenu protiv Odluke Centralne izborne komisije Bosne i Hercegovine broj: 06-1-07-3-104/18 od 07.06.2018. godine kojom je odbijena prijava političke partije Srpska radikalna stranka dr Vojislav Šešelj za učestvovanje na Opštim izborima 2018. godine, na nejavnoj sjednici održanoj dana 11.06.2018. godine, donio je

**R J E Š E N J E**

Žalba se uvažava, odluka Centralne izborne komisije BiH broj: 06-1-07-3-104/18 od 07.06.2018. godine, kojom je odbijena prijava političke partije Srpska radikalna stranka dr Vojislav Šešelj za učestvovanje na Opštim izborima 2018. godine, se poništava u cjelosti i predmet vraća Centralnoj izbornoj komisiji Bosne i Hercegovine na ponovno odlučivanje.

**O b r a z l o ž e n j e**

Odlukom Centralne izborne komisije Bosne i Hercegovine, broj 06- 1-07-3-104/18 od 07.06.2018. godine odbijena je prijava političke partije Srpska radikalna stranka dr Vojislav Šešelj, za učestvovanje na Opštim izborima 2018. godine, za nivoje vlasti navedene u osporenoj odluci po tačkama a), b) c) i d), zbog činjenice da politička partija koja u svom nazivu veliča ime ratnog zločinca ne može biti ovjerena da učestvuje na izborima, nego se može smatrati provokacijom birača i drugih subjekata koji u Bosni i Hercegovini učestvuju na izborima. U cilju zaštite principa slobodnih izbora koji treba da se provedu u mirnom okruženju, CIK BiH je primjenom odredbe člana 7.3 stav (1) tačka 7. Izbornog zakona BiH odbio prijavu.

Protiv ovog rješenja Srpska radikalna stranka dr Vojislav Šešelj je blagovremeno uložila žalbu zbog bitne povrede postupka, pogrešno ili nepotpuno utvrđenog činjeničnog stanja i zbog pogrešene primjene Izbornog zakona BiH.

U žalbi navodi da je pobijana Odluka donesena pozivanjem na odredbu člana 4.6 i 7.3 Izbornog zakona. Naziv političke partije koja se prijavila za Opšte izbore 2018. godine postojao je i prije suđenja, pa ne postoji mogućnost zaključivanja da bi korištenje imena dr Vojislav Šešelj bila provokacija birača i drugih subjekata. Ime stranke je upisano u sudski registar pod tim nazivom, niko nije osporio taj naziv niti podnio bilo kakvu prijavu za promjenu imena stranke usljed mogućnosti provokacije birača, javnog mnjenja ili postojećeg morala.

Osim toga u osporenoj odluci se ne navodi na osnovu kojih činjenica CIK dolazi do saznanja da je ova stranka koristila jezik mržnje. Pozivanje CIK na govor mržnje i veličanje ratnog zločinca jeste rezultat glasanja, a ne primjena obaveze iz Izbornog zakona, jer protiv ove stranke se ne vodi niti jedan postupak radi narušavanja temeljnih vrijednosti i političkih sloboda i govora mržnje ili izazivanja nacionalne netrpeljivosti.

Sve upise promjena u sudskom registru nastale hronološkim redom su dostavljene Centralnoj izbornoj komisiji.

Predloženo je da Apelaciono vijeće Suda BiH žalbu uvaži, pobijanu Odluku CIK BiH preinači tako što će prihvatiti prijavu Srpske radikalne stranke dr Vojislav Šešelj za učestvovanje na Opštim izborima za 2018 godine po tačkama a),b),c) i d). osporene Odluke.

Centralna izborna komisija Bosne i Hercegovine dostavila je ovom sudu odgovor na žalbu u kojem je predložila da se izjavljena žalba odbije kao neosnovana.

Ispitujući ožalbenu odluku u okviru žalbenih navoda, Apelaciono upravno vijeće Suda Bosne i Hercegovine je odlučilo kao u dispozitivu iz slijedećih razloga:

Žalba je osnovana.

Prijavu za ovjeru političke stranke za učestvovanje na Opštim izborima 2018. godine ispred Srpske radikalne stranke dr Vojislav Šešelj podnio je predsjednik stranke Dragan Đurđević.

Naime, iz izvoda iz sudskog registra Osnovnog suda u Bijeljini utvrđeno je da je rješenjem Osnovnog suda u Doboju od 15.01.2014. godine odobren upis osnivanja političke organizacije pod nazivom „SRPSKA RADIKALNA STRANKA“ DOBOJ.

Rješenjem Osnovnog suda u Bijeljini od 08.08.2016. godine izvršena je promjena naziva političke organizacije u „SRPSKU RADIKALNU STRANKU DR VOJISLAV ŠEŠELJ“ BIJELJINA. Izvršen je upis lica ovlaštenog za zastupanje i predstavljanje političke organizacije, Dragan Đurđević.

U predmetnom slučaju je došlo do promjene naziva političke organizacije, a dokumentacija o izvršenim promjenama upisa naziva političke stranke je dostavljena Centralnoj izbornoj komisiji uz prijavu. Činjenica da je ovjerena prijava političke stranke pod nazivom SRPSKA RADIKALNA STRANKA Odlukom Centralne izborne komisije od 26.05.2016. godine govori u prilog tome da je Centralna izborna komisija tada ovjerila prijavu stranke u skladu sa podacima upisa iz sudskog registra, jer je naziv stranka promjenila nakon odobrene prijave.

Neprihvatljiv je stav CIK-e BiH da kao uslov za ovjeru prijave političke partije nakon promjene naziva za učešće na Opštim Izborima za 2018. godinu cijeni naziv te partije imajući posebno u vidu da je ista upisana u sudski registar, a da njen naziv niko nije osporio. Iz spisa se ne može utvrditi da je podnesena prijava za promenu imena stranke usljed mogućnosti provokacije birača, javnog mnjenja ili postojećeg morala kao proklamovanih društvenih vrijednosti, na što žalba osnovano ukazuje.

Centralna izborna komisija je za ovjeru i kandidovanje na izborima bila u dužna da provjeri da li politička stranka koja se prijavila za učešće na Opštim izborima za 2018. godinu ispunjava zakonom propisane uslove za ovjeru, primjenom odredbe člana 4.1-4.25. Izbornog zakona BiH.

Žalbom se osnovano ukazuje na pogrešnu primjenu odredbe člana 7.3 stav (1) tačka 7) Izbornog zakona BiH. Tačno je da navedenom odredbom citiranog zakona nije dozvoljeno da se politička stranka koristi jezikom koji bi mogao navesti ili podstaći na nasilje ili širenje mržnje, ili objavljivanje ili upotrebljavanje slike, simbola, audio i video zapisa, internet komunikacije. U okolnostima konkretnog slučaja te činjenice su od odlučujućeg značaja tek u izornoj kampanji.

Da li će biti provokacija birača i drugih subjekata u vidu nedozvoljenog istupanja političke stranke koja se može cijeliti sa aspekta primjene odredbe člana 7 Izbornog zakona BiH tek predstoji u izornoj kampanji, kojoj prvo prethodi ovjerena prijava za učešće na izborima.

Zato je po shvatanju drugostepenog vijeća preuranjen zaključak Centralne izborne komisije BiH da u fazi razmatranja zakonom propisanih uslova za ovjeru prijave stranke da učestvuje na Opštim izborima za 2018. Godinu, cijeni da li su pravila ponašanja političke stranke u skladu sa odredbama člana 7.1, 7.2, 7.3 i 7.4 Izbornog zakona BiH.

Imajući u vidu navedeno, apelaciono vijeće ovog suda je u cjelosti poništilo odluku CIK BiH broj: 06-1-07-3-104/18 od 07.06.2018. godine, jer Centralna izborna komisija BiH nije razmotrila prijavu stranke u skladu sa navedenim odredbama Izbornog zakona BiH kojim su jasno propisani uslovi za ovjeru prijave za učestvovanje na izborima.

U ponovljenom postupku, CIK-a BiH će ponovno razmotriti prijavu Srpske radikalne stranke dr Vojislav Šešelj za sve nivoe vlasti navedene u osporenoj odluci. Tek nakon pravilno provedenog postupka, a posebno vodeći računa o ukazanim primjedbama, moći će donijeti pravilnu i zakonitu odluku.

Iz navedenih razloga Apelaciono vijeće je žalbu uvažilo i pobijanu odluku poništilo u cjelosti i vratilo na ponovni postupak primjenom odredbe člana 81. stav 1. Zakona o upravnim sporovima Bosne i Hercegovine („Sl.glasnik BiH“, broj 19/02 do 74/10).

**PREDSJEDNIK VIJEĆA  
S U D I J A  
Zvezdana Antonović**